

COSMOGLOTTA

Official mensual organ del OCCIDENTAL-UNION

Redaction e Administration : INSTITUTE OCCIDENTAL, CHAPELLE (Vd), Sviss



COMITÉ
DE
REDACTION :

Prof. E. de WAHL
(Estonia)

Dr Bertil BLOMÉ
(Svedia)

Prof. J. PODOBSKY
(Tchecosl.)

Dr H. NIDECKER
(Svissia)

Nr. 116
Serie A
AUGUST
1937



Desde pluri seculs mult homes provat crear un auxiliari lingue facil e neutral. Li unes basat it principalmen sur li **naturalità** e negliget li regularità (exemples : *Mundolingue* de Lott, *Latino sine flexione* de Peano, etc.). Li altres basat it principalmen sur li **regularità** (exemples : *Esperanto*, *Ido*), e pro to ne hesitat mutilar li international paroles.

Ma, por esser adoptet de omni popules e de omni classes del population, un international lingue deve esser ne solmen regulari, **ma anc presentar un aspect natural** in su radicas e in su derivates. It deve esser fundat sur li **principie del maximum de internationalità** e retrovar li international paroles per su propri regules de derivation.

Li solution de ti problema ha esset tro desfacil pour omni autores de international lingues. Solmen pos 30 annus de provas e experienties, li baltic erudit Edgar de Wahl **successat combinar li naturalità e li regularità**, e formular un systema permissent formar per quelc regules li international derivates.

Occidental ne es un nov lingue, nam it es composit ex li international paroles ja conosset sur li tot terra. Pro to Occidental es **li max facil lingue por li majorité del popules.**

Occidental es diffuset per li **OCCIDENTAL-UNION** quel es neutral in religion e in politica, e per li national societés de propaganda. Li Occidental-Union es directet de un **SENAT**, e del **CENTRAL OFFICIE** durant que li **ACADEMIE** decide pri li linguistic formes.

Li **Institute Occidental** in **Chapelle (Vaud), SVISSIA**, responde immediatmen e gratuitmen a omni demandes de information concernant Occidental, su scope, su grammatica e su vocabularium, e corresponde in francés, german, anglés, italian, hispan, Esperanto, Ido, Occidental.



Pro quo li nomine de
"Occidental"?

CURT GRAMMATICA DE OCCIDENTAL

Infinitives : Finale -r. Ex. : *fini-r, ama-r, deve-r.*

Adjectives : Finale inobligatori -i. Ex. : *micri.*

Adverbs : Finale -men. Ex. : *visibil-men, regulari-men.*

Present del verbes : li radica sol. Ex. : *tu fini, tu ama, tu deve.*

Passate : Finale -t. Ex. : *tu fini-t, il ama-t, noi deve-t.*

Passate composit : per auxiliare ha-r. Ex. : *tu ha finit, noi ha videt.*

Future : auxiliare va. Ex. : *Tu va finir, il va amar, etc.*

Conditionale : auxiliare vell. Ex. : *tu vell finir, yo vell prender.*

Imperative : ples, o li radica sol. Ex. : *Ples finir ! Fini !*

Participie present : -nt. **Participie passat** : -t. **Gerundive** : -nte.

Masculin : -o. **Feminin** : -a. **Plurale** : -(e)s.

Un sol articul definit : li. Adjectives invariabil.

Pronomines personal : Yo, tu, il, illa, it ; plurale : Noi, vu, ili.

Attention ! Por li abbonates de Cosmoglotta :

LI VER HISTORIE DEL LINGUE INTERNATIONAL

secun documentes autentic e inconosset

Quande un mann eminent festa un date de su vive, it es custom adressar le publicmen mult dityrambes. Por festar li 70. anniversarie de Edgar de Wahl noi prefere usar un medie plu conform a su modestie: simplicmen racontar li historie del lingue international e li rol til hodie tro poc conosset del creator de Occidental.

It existe ja pluri Histories del Lingue International, ma, exceptet ti de Couturat quel es antiquat e ti de sr Guérard, omnes tracta li question secun li vis-punctu de Esperanto o Ido, to es: conform al idés del demi-artificialità.

Hodie it es necessari haver un historie redactet secun li modern conceptiones pri li Lingue International. Li publica deve saver que apu li systemas demi-artificial quam Volapük, Esperanto, Ido, **it ha existet anc un scol naturalistic quel serchat soluer li problema del lingue international per un systema tam natural quam possibile.** Ti scol ne posset atraer li public attention til quande li baltic professor Edgar de Wahl publicat in 1922 un systema simultanmen natural e regulari.

Li present historie es solmen un resummate. Obligat restricter it a 16 págines noi regretabilmen devet tacer un masse de explicationes e justificationes. Ma noi indica al letor li fontes inter parenteses. Chascun posse completar su saventie studiante li fontes (Abreviationes: *Doc*: Documentes inviat gratuitmen del Centrale del Occidental-movement, *Cosm.*: Cosmoglotia, *Progr.*: Progreso, *L. I.* = Lingue international). Por li altri referenties ancor ne publicat, li autor de ti studie es pret furnir omni pravas e documentes autentic.

VOLAPÜK — Li unesim L. I. quel esset practicmen usat es Volapük, creat in 1879 del catolic prestro Schleyer, de Konstanz (Germania).

Schleyer ne ha completmen inventet su lingue, quam por exemple li autor de **Sol-re-sol**; il prendet su radicas presc sempre monosylabic ex li lingues natural, precipue anglés, ma deformat les tant que ili devenit irreconossibil. Pro egard al Chineses, queles ne have in lor lingue li son **r**, Schleyer hat partú viceat it per **l**, ne savente que just li japaneses possede **r**, ma ne **l**!

Vi por exemple li traduction del *Pater noster* in Volapük: *Fat obas, kel binol in süls, paisaludomöz mem ola! Kōmomōd monargān ola! Jenomoz vil oliķ, ās in sül, i su tal! Bodi obsiķ vādeliķi givolos obes adelo! E pardolōs obes debis obsiķ, ās id obs aipardobs debeles obas. E no obis nindukolōs in tentadi; sod aidalivolōs obis de bad. Jenosōd!*

Mem un expert polyglott va haver pena reconosser li paroles natural. On divina por exemple que *Fat* = G Vater, *binol* = A to be, G bin, *sül* = F ciel, *as* = A as, *tentadi* = tentation, *sod* = L sed, G sondern, *bad* = A bad.

De 1880 til 1888 Volapük obtenet un success incredibil. Secun li « *Histoire de la langue universelle* » de Couturat, in 1889 it havet 283 societés de propaganda in omni partes del munde, plu quam 1600 diplomat professores, 35 revues ex quel 7 totalmen in Volapük e 316 libres e manuales publicat in li 25 lingues principal. In ti epoca existet circa un million de Volapükistes. Ma pos 1889 Volapük cadet bruscmen. Evenit querelles inter li ductores. Li unes volet ameliorar it, ma li autor refusat omni changes. In 1890 it existet ancor apen quelc propagandistes de Volapük. Tro artificial, ti lingue ne posset viver. Su success esset causat del general beson por un L. I. ma li defectes del systema strax descoragiat li publica. — Hodie Volapük es synonym de lingue fabricat e incomprendibil. Quande on ne comprende alcun jargon, on di: *to es Volapük*.



E. De Wahl, 15 junio 1869
(du annus)



Zamenhof, autor de Esperanto (1859-1917).

ESPERANTO. — Li duesim lingue quel havet grand success es Esperanto, creat in 1887 de dr Zamenhof, oculist in Bielostok (tande polonés Russia). Ermoet del constant inamicità inter li population judéic de divers lingues, Zamenhof, quel anc esset judéo, creat li lingue hodie bon conosset.

In ti epoca anc un yun studiant del università de St Petersburg, Edgar de Wahl, in età de 20 annus, interessat se fortmen pri li problema del L. I. Il hat adheret a Volapük, tande triumfant, e mem composet un lexico de marina in Volapük, ma ti lingue esset tro barbaric por interessar le long. In 1888, informat pri li existentie del nov lingue Esperanto, De Wahl strax intrat in relation con li autor dr Zamenhof, e un long corespondentie evenit inter li du linguistes.

Forsan li Esperantistes ne save que un important amelioration de lor lingue es debit a De Wahl. Li unesim grammatica de Esperanto, aparit in 1887, indicat por li corelatives de témpor li paroles *ian*, *ĥian*, *ĉian*, *nenian*, *tian*. De Wahl signalat quam unesim a dr Zamenhof, que ti corelatives colidet con li acusatives de *ia*, *ĥia*, *ĉia*, *nenia*, *tia*, e proposit le li paroles adoptet desde tande: *iam*, *ĥiam*, *ĉiam*, *neniam*, *tiam*. E quelc altri minu important corectiones proposit de De Wahl esset fat in li *Aldono al dua libro*, publicat in li annu secuent.

Ti fact monstra, que Esperanto ne ha esset « longmen incubat » quam su adeptes aserte hodie, nam ye su publication su autor ne hat perceptet li eria decovrit de De Wahl. In realitá Esperanto esset ja pret in 1879, quande Zamenhof havet 20 annus, ma il publicat it solmen 8 annus plu tard. Li defectes del lingue es do excusabil pro li extrem yuness del autor. It es remarcabil que li sol changes fat in Esperanto desde su nascentie es debit a De Wahl. In secuent noi va vider que il ha ameliorat anc Idiom Neutral e Ido.

Pos Zamenhof e Grabowski, De Wahl es li triesim person, quel ha scrit un brochura in Esperanto: li traduction de « *Princino Mary* », de *Lermontov*. It esset editet de Zamenhof pro que De Wahl ne havet li pecuniari possibilitá payar li custas (il ha sempre esset sin fortun). In plu, li russ oficero composet li unesim *lexico Hispan-Esperanto* e un *lexico de marina* adaptat de ti in Volapük.

Zamenhof e Grabowski essente mort, on posse dir que De Wahl es hodie li **max ancian autor esperantistic ancor vivent**. Tamen li lingue Esperanto ne satisfat le. Il volet, con mult altri reformistes, desembarassar Esperanto de su artificial formes. Il persuadet Zamenhof far ti reformes ante que li lingue esset stabilisat pro li necessitás editori.

Li numero 41 de *Cosm.* (juli-august 1927) contene un articul « Interlinguistic reminiscencies » in quel De Wahl raconta pri su interlinguistic activitá durant li epocas de Volapük e Esperanto. Noi recomenda leer it. Precipue Esperantistes va trovar ta mult interessant informationes pri li « heroic » periode de lor movement e pri li rol quel li futur autor de Occidental tande ludet in it.

LI REFORM DE 1894. — In 1894 Zamenhof do proposit li secuent project de reformes a su adeptes: *Supression del litteres circumflexat, del obligatori acusative e del inventet paroles corelativ, invariabilitá del adjective, revision del vocabularium.*

« *La Esperantisto* » de novembre 1894 publicat li resultate del votation: por li reformes 107, contra li reformes 157. Du Esperantistes votat por un complet reform del lingue, un de ti du esset De Wahl, quel hat sempre instigat Zamenhof far li radical reformes durant que it ancor esset possibil. Pos li votation De Wahl abandonat Esperanto e laborat con Lott quel volet soluer li problema in direction naturalistic.

Li Idistes ha sovente evocat li votation de 1894, regretante li ciecitá del Esperantistes del epoca; in fact, li propositones de Zamenhof coincide presc sempre con li postulaciones del reformistes de 1907 e de Ido hodie. Ma li person realmen culpabil pri li fiasco del reform de 1894 es... De Beaufront! Il self ha declarat in su « *Bulletin Français* »

Ido * (april 1931): *Si li reform de 1894 ne successat, to veni de que sr René Lemaire e yo fat a it li max energic oposition. E pro quo De Beaufront fat naufragiar li projecte de Zamenhof? Pro que it abolit completmen li acusative (!), pro que it identificat adjectives e adverbs. (Li manca de acusative, e li frequent usation del adjectives quam adverbs nequande causa miscomprendes in Occidental!), e pro que on ne deve reformar un lingue quande it apen comensa difuser se! Stupid e fals rasonament quel forsan es ancor hodie li ver cause del insuccess del L. I.*

LOUIS DE BEAUFONT. — Markese L. de Beaufront, mort in verne 1935, hat adheret Esperanto in 1888 (do pos que ti lingue ja hat esset corectet secun li consilies de De Wahl). Til 1895 il propagat con su amico René Lemaire, secun su propri declaration *sin bruida e moderatmen* (Bulletin Français-Ido 1933), nam it esset prudent atender por vider quo devenit li reform-project e votation anunciat in *La Esperantisto*.

Solmen pos 1895 il comensat propagar energicmen. In 1898 il fundat li *Société francés por li propaganda de Esperanto*. Bentost pluri scientistes interessat se pri Esperanto. In 1898 Ernest Naville propagat it che li Academie del scienties moral e politic, in 1901 li francés generale Sébert presentat it al francés Academie. Con su amico Javal, li ciec e rich Academico medicinal, il fundat in 1905 li *Centra Oficejo* in Paris. Li potent libreria *Hachette* in Paris interessat se pri li movement, e interprendet edition in Esperanto sur grand base. Li success venit rapidmen. De 1900 til 1907 Esperanto havet li sam crescent success quam Volapük 20 annus antey. Ma in sam témpor evenit anc li **stabilisation definitiv del systema**. Por un altri lingue plu perfect li portas esset cludet, anc por qualcunc amelioration de Esperanto.

LI SCOL NATURALISTIC. — Til hodie li grand publica conosse solmen li lingues international del typ **Volapük, Esperanto, Ido**. Ma on deve saver que paralelmen a ti systemas demi-artificial ha evoluet un scol de lingues quel sercha soluer li problema per li metode *a posteriori*, to es adoptente li vocabules sin mutilar les.

Li L. I. natural ne ha esset decovrit de un sol hom, it es li resultate de divers serchas de mult exploratores queles ha completat unaltru. Li unesim provas de *a posteriori* lingues ne es tam old quan tis del *a priori* systemas queles data del epoca de Descartes e Leibnitz.

Li unesim idé de un L. I. natural trova se in li famosi *Encyclopedie* de Diderot. It esset proposit in 1765 de **Faiguet**, tresorero de Francia. It consistet solmen in un skiss de grammatica. Li adjectives esset ja invariabil e li plurale finit per *-s*. Cose tre remarcabil: li presente del verbe finit per *-as*, li passate per *-is*, li future per *-os*. Pro que ti finales es inventet, on posse questionar, ca Zamenhof ha copiat Faiguet!

In 1839 un instructor de Wiesbaden, **Schiper**, publicat su **Communicationsprache** quel il basat sur li francés pro que *li lingue francés es li max conosset*.

In 1858, **Lucien de Rudelle**, professor de lingues vivent in Paris, combinat li 10 lingues national queles il conosset. Solmen li grammatica de su **Pantos-dimou-glossa**, de quel li aspect esset sat barocc, aparit.

In 1868 **Pirro** crea un project vermen remarcabil in ti epoca, nominat **Universal Glot**, basat principalmen sur li latin vocabularium con mult germanic e mem grec paroles. Vi un exemple:

I habe perkursed el Holland, i habe visited seni principal citad, li Hollander ese molt amatli gent, ili ese mild e vorkli lor konmerk ese molt extended, on finde Hollander in toti land e pertot ili ese amated e prised.

Li aspect es, quam di sr A.Z. Ramstedt, quel analysat ti lingue in *Cosm.* nro 78, ** inter catalan e nord-germanic, quam un proto-Novial **. On comprende do que sr Jespersen mult admirat Pirro e considerat le quam su precursor.

In 1883, **Volk e Fuchs** de Berlin publica un **Weltsprache** de quel li vocabularium es in grand parte latin e li grammatica complicat.

In 1885, **Courtonne** de Nice crea li **Langue internationale neo-latine**. Courtonne esset li unesim quel usat li epitet ** auxiliari ** por caracterisar un L. I. Su project esset proposit del ** Société niçoise des Sciences ** a omni scientific societés del landes de lingue romanic.

Samli in 1885, **Steiner**, professor in li gymnasie de Saverne publica su **Pasilingua**. Steiner volet, tam mult quam possibil, ne inventer necos arbitrarimen e presentat su project quam li antipode de Volapük, quel esset in ti epoca in plen triumf. Tamen, sam quam por Volapük, li base del vocabularium de Pasilingua esset anglés. Ti lingue ne obtenet adeptes ma solmen teoric aprobatones. **Steiner** provat lassar in 1889 un revue mensual ** Ta Pasifolia **, ma sin success.

In 1887 aparit li ** Weltsprache ** de **Eichborn**, in Bamberg (Germania), e **Esperanto** de dr **Zamenhof**.

Pos li subit decadentie de Volapük e li tendentie del interlinguistes vers un plu grand naturalité, mult projectes naturalatri aparit in reaction al artificialité de Volapük.

In 1888 **Lauda** de Berlin, publica **Kosmos**, proclamante que ** un L. I. ne deve esser inventet **. In li sam annu **Henderson** de London publica **Lingua** quel il poy perfectionat a **Latinesce** quel aparit in 1901 e quel es tre proxim a Occidental. On aproxima se sempre plu al typ ideal e definitiv, ma li via es ancor long. In 1889, **Heinix** de London

pensante que li du max conosset lingues del tot munde es anglés e francés, crea **Anglo-Franca**, compromiss inter francés e anglés. Li grammatica es anglés ma li vocabularium presc completmen francés. Anc in 1889, **Stempf**, prestro in Kempton (Bavaria), publica **Myrana**, reformat sub li nomin « **Communia** », quel prende latin quam base del vocabularium.

Ti epoca sembla vermen extraordinarimen fecund por li naturalism in li L. I. In 1890 dr **Rosa**, director del Zoologic Muséo de Turin creat **Nov latin** de quel li titul indica li base. Dr Rosa proposit ja por li conditionale li auxiliare *vell*, quam in Occidental, e por li future *vol*.

In 1889 aparit li remarcabil project **Mundo-lingue** de **Julius Lott**, ex-oficero de artillerie, station-chef del Nordbahn in Wien. Li similitá de Mundolingue con Occidental es extraordinari e explica se per li intim corespondentie inter De Wahl e Lott. Li influentie ha esset reciproc. Mundolingue havet ja li aspect de Occidental, ma ne posset dar clar regules por formar li vocabularium international. De Wahl trovat les solmen mult plu tard.

In ti epoca, in li plen regne de Volapük e de Esperanto **on ne comprendet li avantagie del naturalità, e li labores de Lott et De Wahl ne posset interessar li publica**. Lott, descoragiat, cessat ocupar se pri li L. I., ma ricevinte li project de Liptay (vide li secuent §) il constatat con joya que ti medico chilian ha arivat al sam resultate quam il. Il reprendet do li plum, perfectionat su project sub li influentie de su colaborator De Wahl e presentat it in un libre al Universal Exposition in Paris 1900. Ma interim De Beaufront in Francia hat gruppat li interessates del L. I. circum Esperanto e successat per su sofistic argumentes alontantar les del conception naturalistic. Lott, completmen demoralisat, cessat omni activitá interlinguistic e morit in 1905 inconosset e incomprendet mem de su propri familie quel hastat destructer omni su « paperalya » pos su morte. Malgré recent serchas in Vienna che su descendentes on ne retrovat necos de su labores. (Vide Cosm. nr 68).

In 1892, dr **Liptay** in Chili, medico del naval comission chilian in Francia, publica su **Langue catholique**, un titul tre inhabil, nam li original signification del parol « catolic » (Grec *kat holous* = *por omnes*) essente presc inconosset apu li plu tard sens religiosi, li usation del lingue semblat restrictet a un special publica. Liptay reprochat a omni anterior projectes esser solmen arbitrari creationes, exceptet ti de Lott. Su libre, publicat in Paris e traductet in hispan e in german, redat coragie a Lott.

In 1893 aparit **Universala** de **Heintzeler**, quel esset professor in li gymnasie de Stuttgart e **Novi-Latin** de **Beermann**, professor in li gymnasie de Nordhausen (Leipzig), ambi fundat sur latin vocabularium.

In 1897, **Puncher**, professor de lingues modern in Linz, publica **Nuove-Roman**.

In 1900, **Kürschner**, anc professor de lingues vivent in Orselina apu Locarno perfini su **Lingua komun** quel esset tre proxim a Occidental e a **Mundolingue**.

LI DELEGATION. — In 1901, li francés filosof e matematico Couturat, auxiliat de su amico Leau, interprendet soluer li question del L. I. scientificmen e impartialmen. Il fundat un Delegation por li selection de un lingue international auxiliari, a quel adheret poc a poc circa 310 societés e 1250 academicos e professores del tot munde. Finalmen in 1907 li Delegation, sempre sub li impulsione de Couturat, decidet far li selection; it nominat un **Comité del Delegation** quel reunet se in 18 sessiones del 15 al 24. octobre in li Collège de France por audir li autores de L. I., judicar lor projectes e adopter li max bon.

Li Comité cludet su labores per li secuent declaration unanim, do anc con li voces del Esperantistes: *Necun del lingues propagat til tande es adoptet in bloc, tamen li comité adopte in principie Esperanto pro su numerosi « aplicaciones » ma con li modificationes in li sens indicat per li raport del secretarios e li project Ido*. Zamenhof hat comisset su amico De Beaufront defender Esperanto in li comité. Separante se ye li 24. octobre, li comité nominat un « **Comission permanent** » por « interconsentir con li Esperantistes pri li reformes a introducter in Esperanto ». It esset composit ex srs Couturat, Leau, Jespersen, De Beaufront, Ostwald (li famosi scientist german) e Baudouin de Courtenay. Li du ultimes demissionat bentost pro que li tendentie e activitá de Couturat-De Beaufront ne pleset les. Li 4 persones restant decidet ja ante li ruptura con li Esperantistes prender Ido quam base de discussion. Do it es fals, dir que li Delegation adoptet Ido: solmen 4 membres del Comission permanent decidet to. Ma, quam noi fat remarcar in Cosm. nro 93, inter ti 4 persónes almén 2 esset li autores (ver o anonym!) del lingue adoptet, Leau ne posset ne secuer su grand amico Couturat, e Jespersen secun su propri declaration in « Mondo » 1927 votat contra su linguistic convictiones, ne suspectente que su colegas esset judicos e judicates in sam témpor.

Esque on posse vermen nominar scientific un judicament fat in tal conditiones e truder it por li eternitá a omni interlinguistes del terra ???

Couturat, Leau, Jespersen, De Beaufront comensat propagar Ido. To incoherat li Esperantistes; un long guerre inter li du parties evenit — it continua ancor hodie. Chascun camp rejecte li responsabilitá sur li altri. To es, in poc paroles, li oficial version del historie. On posse trovar su detalies in publicationes esperantistic e idistic. Noi desira completar it per documentes inconosset til hodie.

LI ARKIVES DEL DELEGATION. — In li comensa del secul Couturat hat colectet numerosi documentes pri li problema del L. I., documentes completat per li enorm correspondentie del filosof con interlinguistes de omni colores, e per li arkives del Delegation.

Desirante scriir un historie de Ido secun li documentes autentic, yo petit in estive 1920 li vidua de ar Couturat permisser me forprender de Paris li parte del correspondentie concernent ti epoca de 1907 a 1913. Sra Couturat acceptet me tre amabilmen in Paris, e in li buró de Couturat noi selectet li max interessant pacca de lettres. Couturat hat morit brusmen, in un accident de automobil in li unesim dies del guerre in 1914. Su tot correspondentie esset classificat in carton-covrimentos secun li nómines del expeditores. Omnicos esset complet exceptet que li pacca de correspondentie Couturat — De Beaufront mancat! To semblat me tam plu regretabil que in ti pacca devet trovar se li max interessant documentes pri li afere de 1907. Questionat pri ti manca, ara Couturat dit me que 3 semanas antey De Beaufront, hante esset informat pri mi intention, hat venit e forportat cert lettres e specialmen su proprias.

Pro que in ti epoca yo esset conosset quam bon Idist e havet excellent relationes con De Beaufront, yo esset tre astonat pri ti action preventiv e comensat suspecter que aliquos ne rect hat eventit in 1907. Fortunosimen De Beaufront hat obliviat inspecter omni paccas de lettres, e talmen cert documentes compromettent hat restat.

Con un valise plen de preciosi documentes yo revenit in Svisia, studiat les atentivmen e renunciat scriir li historie de Ido, pro que li letura del arkives del Delegation bentost convictet me que li verdict de 1907 esset nullmen seriós e sciencic; ne pro li rasones alegat del Esperantistes, ma in contrari, pro que **li decision del Delegation hat esset falsat per considerationes oportunistic e fat sub li exagerat e presc exclusiv influentie del movement esperantistic.**

Si yo publica li secret arkives del Delegation, it ne es por reviventar li long e maliciosi polemicas inter Esperantistes e Idistes — lor antagonism es nos indiferent — it es solmen por monstrar que in 1907 on ne ha judicat sciencicmen, on ha esset injust contra li defensores del naturalité. **On ha sacrificat les al interesses del esperantistic editores,** in li fals esperantie que un compromiss esset possibil.

In 1907 Couturat esset considerat quam li max ardent defensor del idé del L. I., neutral inter li divers systemas. Su grand *Historie del lingue universal*, aparit in 1901, incontrat un tam grand success que it devet esser reprintat in 1907. In ti sam annu il ancor publicat un excellent brochura *Pour la langue internationale* tractant ti problema secun un vis-punctu general, e poy su famosi *Studie pri li derivation in li L. I.* in quel il criticat li irregularitás de Esperanto e proposit remedies por regularisar les.

LI JUDICIE DEL DELEGATION. — Couturat hat consacrat su tot vive al solution del problema del L. I. Tre activ e tre rich, il negliget null medie por far successar su interprese: li Delegation. Il ambitionat far de su Comité un aeropag del max competent linguistes. Il ofertat un piazza in ti comité al famosi linguist **Meillet.**

Meillet refusat pro manca de témpor, ma il dat a Couturat quelc bon consilies: il recomandat le ne accepter Esperanto sin radical reformes e, por exemple, supresser li acusative in li L. I. Il scrit: « Esperanto deve esser tre simplificat, tre purificat de grammatic notiones e procedenties, queles li modern lingues tende a eliminar. »

Inter li altri invitat linguistes solmen **Jespersen** (Copenhag) e **B. de Courtenay** (St. Petersburg) acceptet. Li altri membres del Comité esset Esperantistes o Pro-esperantistes; on conosset solmen Esperanto, li altri projectes esset apen egardat.

Couturat, quel bon conosset li defectes de Esperanto e ne intentet laborar por confirmar simplicmen ti insuficent systema, esset fortiat contentar se per un compromiss: it es per un *Esperanto reformat*. Il esperat til li ultim moment, que Zamenhof vell accepter ti solution, pro que in 1894 ti ci self hat proposit un simil reform. Ma li situation plu ne esset li sam. Desde pluri annus Zamenhof hat acceptet li apoy del firmas comercial.

To ne es solmen un suposition. Pastor Schneeberger, president del duesim congress de Esperanto (Genève 1906), monstrat me unquande li prova: un lettre de Zamenhof in 1906 in quel il assertet que it vell esser le impossibil changear quocunc in Esperanto pro que il esset ligat per contract con li firma Hachette.

Un fact ha sempre astonat me. Li Idistes parla in omni prospecte de propaganda pri li 310 societés hant adheret al Delegation, e in realitá ne un sol de ti 310 societés ha usat Ido pos 1907. Li arkives del Delegation explicat me ti enigma:

Li judicament de 1907 ne posser esset inpartial e sciencic, proque li Delegation laborat sub influentie total, quasi terrore esperantistic, sub li pression del editorial interesses (Hachette e Presa Societo) e principalmen pro que ti 310 societés hat

adheret al Delegation mersi al efforts de quelc notori Esperantistes (de Saussure, General Sébert, Privat, etc.) e esset influentiat per ili. Quande li Delegation preferet Esperanto reformat a Esperanto de Zamenhof, **li intermediatores esperantistic naturalmen strax obtenet del sam societés lor retrada del Delegation!** To esset a previder. E finalmen ni un sol del 310 societés acceptet o propagat un sol vez li lingue del Delegation!

Li duesim motive quel fat naufragiar un acord inter li Esperantistes e li Comité es, que Zamenhof **ne havet fide in li potentie del Delegation**, in su medies imposar su decisiones. Devente selecter inter li successosi apoy del grand firmas postulante li mantenentie del primitiv Esperanto, e li eventual apoy de un litt comité ductet de Couturat, Zamenhof ne hesitat!

Anc un altri membre del Comité ludet un rol equivoc. Stead, influent journalist, director del grand *Review of Reviews*, oposit se a omni reformes, e on descovrit plu tard, que il esset anc ligat con li firma Hachette! Do, in ti comité, quel devet laborar scientificmen, trovat se homes ligat con un firma editori per un contract quel interdit les propagar un lingue altri quam Esperanto orthodox! Stead esset considerat quam un fantast in Anglia, il hat predict que il va morir in un naufragie, imbarcat sur *Titanic* in 1912, quel, quam on save, incontrat un iceberg. Quande li nave desaparit in li mare, Stead petit li orkestre luder li famosi cant: "Plu proxim a te, mi Deo".

UN TACTIC ERRA DE COUTURAT. — Couturat esset un mann sincer, devoet, e un incredibil laborator — ma quam sovente li homes activ, il ne sat egardat psykologic factores. In li moment del max acut tension inter li reformistes e li stagnistes, il informat oficialmen li president del Lingva Komitato ye li 2. nov. pri li resultate del sessiones: *que li Comité del Delegation hat adoptet in principie li project Ido e que li Comission permanent ne intentet modificar ti project e que ti Comission atendet li propositiones del Lingva Komitato concernent Ido ante un mensu.*

Boirac strax inviat a Ostwald un lettre por protestar contra un tal interpretation del decisiones final del comité. Il scrit: *Yo ne comprende pro quo vice proposit al LK li modificationes queles on desira introducer in Esperanto adoptet in principie, sr Couturat parla nos pri un project Ido adoptet in principie... Adplu it es me impossibil consultar li Lingva Komitato disperset in li tot munde pri questiones tam important pri queles yo self ne mem es bon informat e responder a sr Couturat in li curt spacie de un mensu.*

It es evident que sr Boirac esset in jure protestar. On ne comprende pro quo Couturat esset subitmen tam inhabil e hastosi, pos que il hat retardat durant long annus li judicament del Delegation.

Informat pri li subit postulationes de Couturat, li representant de Boirac, Moch, scrit a Couturat un lettre tre instructiv: *... Vu peti me insister pri li idé que adoptente Ido li Comité del Delegation ha acceptet circa omnicos quo it posset accepter de Esperanto. Secun vu, to es li impression quel yo deve har retenet de nor sessiones... Ma yo ha retenet li impression just oposit. Li comité ha nullmen « adoptet Ido » ma solmen Esperanto a modificar in li sens indicat de Ido e in unesim loc de vor raport... Ma vu es tant hypnotisat per li project Ido, que vu ha scrit in li sam sens a sr Boirac un lettre a quel yo regretabilmen deve oposir un oficial protest.*

Poy, mult lettres esset exchangeat inter Ostwald, Boirac, Moch e Couturat sin resultate; li fide hat desaparit, tam plu quam un altri afere juntet se al unesim:

Li 10. novembre Boirac scrit a Ostwald que il ja ha recivet quelc responses de su Lingva Komitato concernent un acord con li Delegation. Il scri: *omni membres desira haver plu mult informationes pri ti project Ido, e on comensa creder que ti pseudonym cela un del membres del Comité, e tamen li regulament excludet de ti corporation omni autor de lingue international.*

A ti tot natural demande, Couturat respondet in un ton tam brusc e inexpectat que un acord devenit desfacil, presc impossibil.

It es incontestabil que Couturat monstrat un astonant manca de diplomatie in ti delicat negociationes con li Esperantistes. Forsan to explica se ex un passu quel noi trova in un lettre quel Förster, li german scientist, honorari president del Comité, inviat a Couturat li 19. nov. 1907: *Qualmen li situation, quel esset favorabil in li sessiones del Delegation, ha esset changeat bruscmén in un statu de tension hostile... judicante secun li ton de vor lettres a Sr. Boirac yo have li dolorosi impression que vu suffre seriosimen de un specie de superexcitation causat probabilmen del excess de vor labores...*



Louis Couturat, autor de Ido, 1868-1914.

LI VER AUTOR DE IDO. — Ancor hodie nequi dubita que li autor del project Ido es De Beaufront. Noi posse revelar li veritá e prubar it per li autentic documentes : **li ver autor de Ido ne es De Beaufront, ma Couturat self.**

Li patrinitá de Ido ne posse astonar nos. Durant 10 annus Couturat hat studiat li problema del L. I. tam profundmen que il esset considerat quam li max competent interlinguist. Su grand *Histoire de la langue universelle* completat per li *Nouvelles langues internationales* publicat in 1907, su brochuras de propaganda in favore del L. I. in general, su creation del *Delegation por adoption del L. I.* e in fine su *Étude sur la dérivation dans la langue internationale* fat le li max sapient specialist del L. I.

Esque on posse creder, que un mann quam Couturat ne havet anc su propri idés pri li L. I. quam tam mult altri homes ? Esque it ne esset natural que pos har examinat e judicat tam mult projectes, e conoscente li qualitás e defectes de tam numerosi propositiones, il vell in fine condensar li final resultate de su observationes in un project ? Li letura de su vast corespondentie pruba que **ja pluri mensus ante li reunion de 1907 Couturat hat elaborat un plan de reformes de Esperanto e submisset it a su intim amicos.**

Li idé de un reform de Esperanto ja « flottat in li aer » : Ja durant li Esperanto-congress in Genève 1906 evenit un reunion secret inter dr Zamenhof, dr Javal e comandant Lemaire por discusser li question del necessari reformes.

Pro que dr Zamenhof alegat li obstacul comercial e financiari, dr Javal e li belg explorator, comandant Lemaire, ofertat le 250.000 fr. por liberar le del protection del editores. Dr Zamenhof acceptet in principie e promisset elaborar un plan de reformes. Poy il revenit a Paris con reformes queles aparit insuficient, e dr Javal e Lemaire retraet lor oferta. In fact dr Zamenhof proposit solmen vicear li accentus per un **h** pos li litteres concernet !

Li reform de Esperanto, li futur Ido, esset in realitá preparat durant estive 1907 de Couturat, con aprobaton de Lemaire. Lemaire reinviat a Couturat li detalies de ti projecte ye li 2 mai 1907 accompaniat per li secuent lineas, queles noi lassa pro lor importantie in li original textu francés :

Pouvez-vous présenter vous-même votre projet à la Délégation ? Sinon je me mets à votre disposition comme homme de paille... Je vous fais cette proposition en tout bien tout honneur et, dois-je le dire, avec le seul désir de vous aider éventuellement, mieux que par mon simple appui.

Noi ne have li response de Couturat, ma on conosse li historie. Zamenhof ne admisset reformes, il do selectet De Beaufront por defender Esperanto ortodox in li sessiones del Delegation. De Beaufront quel desde quelc annus stat un poc in li ombre, detra li nov chefes de Esperanto, videt in ti function un medie reprendre su rol de ductor. Esque il fat a Couturat li sam proposition quam Lemaire — it es luder li rol de « homme de paille » — (pseudo-autor) — o esque Couturat proposit it a le, to on probabilmen nequande va saver, ma in omni casus omni principies de Ido esset poc a poc reunit de Couturat pos discussion con su amicos, durant que nequande li nómin de De Beaufront esset mentionat. Ti ci aparit quelcvezes in li lettres de Couturat adressat al reformistes ja in estive 1907 (a Michaux e Lemaire) quo pruba que li Markese ja inclinat secretmen a un reform. Ma li reform-propositiones de De Beaufront concernet solmen li pronómines e adjectives demonstrativ.

Omni altri principies de Ido esset idés favrit de Couturat durant li ultim annus. In su corespondentie il sempre parla pri li sam reformes in Esperanto : plurale per **i**, abolition del litteres circumflexat, del acord del adjective, del obligatori acusative, adoption del derivation Couturat, revision del vocabularium. In contrari, De Beaufront hat til li ultim moment combattet contra ti heresies in su publicationes e monstrat lor inaptitá. Couturat esset rect, quand il scrit a B. de Courtenay li 17 sept. ti lineas significativ : *Li project Ido ne es altricos quam li syntese del reformes postulat desde long del max bon, max competent, max clarvident Esperantistes. Si it ne vell har esset elaborat de sr De Beaufront, it vell har esset fat de altres, e li question vell esser sempre li sam.*

It esset un erra selecter quam « homme de paille » precismen De Beaufront quel ne esset amat pro su caractere orgoliosi e susceptibil e conosset pro su conservatism. Un reform presentat de il ne posset esser considerat quam sincer del popul esperantistic. Adplu, pro que il hat acceptet defender Esperanto primitiv de Zamenhof, il moralmen ne devet accepter defender in sam témpor Esperanto reformat de Couturat. **It es incomprendibil que ni Couturat ni de Beaufront videt li inevitabil resultate de ti manovre. O plu bon, ili previdet it, e pro to decidet li anonymatu, quo esset ancor plu inhabil !** Ambi fat li sam erra quam mult altri chefes : ili ignorat li potentie del sentiment che li hom. De Beaufront esset considerat quam li gendarm del ortodoxie. Ancor in 1904 il hat denunciast con indignation li revue canadian *La Lumo* quel, ne possente trovar litteres circumflexat, hat aparit sin ili. Boycottat, « La Lumo » morit. (Progr. nro 16).

Adver, in li Delegation De Beaufront sembla har ludet mult plu bon li rol del avocat del Esperanto de Zamenhof quam de Esperanto reformat de Couturat ! Li prova es trovabil in un lettre de Couturat a Courtenay in 1908 : Li duplicita de De Beaufront hat indignat anc B. de Courtenay quel pos har conosset li verita demissionat del « Commission permanent ». Couturat respondet le inter altris per li sequent argument :

Pri li rol de sr De Beaufront quam representant de dr Zamenhof, esque vu, quel ne es Esperantist, have li jure, demandar un explication ? On ne posse reprochar le que il ha pledat por li project Ido. Vu memora que il ha finit su explicationes per dir : minu vu va changear Esperanto, plu securmen vu va esser secuet del majorite del Esperantistes.

De Beaufront esset in su profund un conservator e ha restat un conservator anc che Ido. Ma il esset capabil defender un afere mem contra su convictiones si il judicat to util ! (On ne mey obliviar que il esset un jesuit por quel li scope justifica li medies.) Un prova : Parlante pri li suffix mal- de Esperanto, De Beaufront scrit in su Bulletin Francais : Ido de januar 1922 : *Yo antey defendet ti infelici suffix, — yo esset obligat far it (« il le fallait bien ») — ma yo ja savet que li ver suffix del contrarie esset des-.*

LI DUPLICITA DE DE BEAUFONT. — U li duplicita de De Beaufront ha excedet omni limites possibil, es in li facte sequent. Strax pos li reuniones del Comité, De Beaufront exposit li situation in li organ del Esperantistes de Francia e concludet, contra un reform (!!!) : *Lass nos continuar tranquilmen, energicmen nor propaganda e developar Esperanto, lass nos ne perdir nor tempor in discussiones con Ido.* Altrimen dit, pos adoption de Ido per li Delegation, De Beaufront consiliat al Esperantistes ne ocupar se pri it, por bon prubar que il esset contra ti project. (Vide « Conférence contradictoire » in li « Bourse du Travail » 27. jan. 1912).

Ti hypocrisie causat che li publica e che li Esperantistes **un comprensibil indignation quel fat impossibil qualcunc interconsentiment.** Li innumerabil articules scrit de Couturat inter 1908 e 1914, e de De Beaufront self desde 1908 til 1935 ne-quande posset justificar ti nauseant duplicita.

Li tactica de Couturat e De Beaufront esset far adopter Ido per li Esperantistes e solmen poy far conosser su autor. Nequi, exceptet ili self, conosset li verita ; li altris solmen conjectet it.

Ma un eveniment presc comic destructet li combination. Sciente un vez in sam tempor a De Beaufront e Jespersen, Couturat interchangeat per erra li lettres in li coverts, talmen que Jespersen ricevet li lettre adressat a De Beaufront e contenen alusiones al afere !

Questionat de Jespersen, Couturat ne posset negar. Jespersen, tre vexat, scrit li 27. febr. 1908 a Couturat : *Yo ne esset content quande vu scrit me que Ido es sr De Beaufront... e per sam posta yo scrit le que il mey publicar su identita in li unesim numero de Progreso... nam su silentie prolongat posse nocer li afere del L. I. Plu long il ne va posser celar se — on comensa ja suspecter le — e mult expressiones de dr Zamenhof in su circulars e su privat lettres (queles on monstrat me) fat me divinar que su colere es directet contra sr De Beaufront e que il considera nos quam su complices. E to yo comprende bon pro li position de sr De B. quam representant oficial de Zamenhof avan nor tribunale.*

Poy Jespersen menacia demissionar del Commission permanent si De Beaufront vole conservar su anonymatu e adjunte que sr Ostwald intente far lu sam. Il opine que un indispensabil condition de lor victorie es que ili labora apertmen e francmen.

Qualmen Zamenhof acceptet li trahition de De Beaufront, pri to un lettre ineditet informa nos.

Li 29. august 1908 Jespersen scrit a Couturat : *Mi dan amicos hat arangeat un interview inter Zamenhof e me durant mi sejour in Copenhag ; noi parlat quam bon amicos ma naturalmen sin resultate : yo ne posset convicter le, ni il me, naturalmen ! Il considerat li conduida de De Beaufront quam « scandalosi » (schändlich) e su paroles confirmat me in li conviction quel yo ja havet, que omnicos vell har havet un altri aspect, si sr De Beaufront vell har refusat esser li representant de Zamenhof che nor Comité. To naturalmen ne changea mi attitude pri li lingue self, ma yo ha repetit ti cosas mult plu quam un vez.*

LI COMMISSION PERMANENT. — Li Commission permanent reunet se solmen un vez, li 25. octobre 1907 (Progr. I, p. 9) con li sol presentie de Ostwald, De Courtenay, Jespersen e Couturat, queles discusset solmen detalies. Poy li discussiones continuat per correspondentie. **Nequande on discusset li problema cardinal : li vocabularium.** It esset composit de Couturat e De Beaufront sol, con quel consilies de Jespersen.

Li Delegation hat nominat li Commission permanent solmen por interconsentir con li *Lingva Komitato* de Esperanto. Ma pro que on ne hat previdet quo ti Commission devet far in casu de non-acord, li quar membres ancor activ (Courtenay e Ostwald hat retraet se) considerat se quam liber acter quam ili volet. Pos li ruption con li Esperantistes ili vell nu har posset laborar scienticmen, sin egard a concessiones a far con li Esperantistes. Ma ti quartett havet un punctu de vise mult tro strett. Ili rasonat quam si solmen Esperanto e Ido vell exister sur li terra ! Ne un sol pensa esset dedicat al naturalistic conception, quel Couturat tamen conosset bon. Jespersen self submisset al vota del comission un project **Eklekta** quel il hat elaborat in hast durant li sessiones del Comité del Delegation.

Du pagines de manuscrit indicat li grammatica, ma ne li vocabularium quel devet esser ti de Ido. Vi quelc trates caracteristic : *Pronomines personal* : mo, to, vo, lo, la ; refl. : so. Plural : ni, vi, li, loi, lai. *Pronomines possessiv* : mu, tu, vu lu (masc. lou, fem. lau) su, niu, viu, liu (loiu, laiu). *Neutres possessiv* : mum, tum etc. *Substantives per -o* : che entes vivent, -o indica li masculine, -a li feminine. Plurale per -i : horo, hori, fratoi, fratai. Por li possessiv adjectives regulari formes : laiu, laui, laiuli etc.

Vi un linea de Eklekta quam exemple : *Le garsai plendas ke lai rompis liu lignu soldati e disjetis liu membri.*

De Beaufront ne havet pena demonstrar li mancas de ti projecte. Il scrit al Comission permanent, it es a Ostwald, Couturat, Leau, Jespersen, De Courtenay : *Yo repeti al Comission permanent, quo vo ja dit al Comité del Delegation in li « Collège de France » : Si noi vole que li Esperantistes, o almen un bon numer de ili, accepte li reform del Delegation, ti ci deve changear minim possibil li afixes de Esperanto. Yo dit it e repeti it con nov insistentie : chascun passu alontanant nos del supra opinion va alontaner nos del chance e presc del possibilita de un acord con li Esperantistes.*

Poy De Beaufront proposi restar che li project acceptet del Comité, i. e. Ido, e fa un critica tre long e detalist del project Eklekta de Jespersen.

Eklekta esset rejectet. Jespersen self votat contra it ! Couturat naturalmen insistet por prender li project Ido quam base de discussion. Noi cita su circulare in li sequent capitul. Leau ludet un rol presc passiv apu Couturat. Tamen un document monstra que il proposit changear Ido : supresser un vez li finale -o, un vez -a por rupter li monotonie. Il anc proposit suffixes -or e -el por li persones, p. ex. kavalor, muzikor, kavalelo, muzikelo, e fat li sequent remarca quel justifica li conception naturalistic :

On ne deve timer un excess de afixes. Lor grand numer rupte li monotonie e permesse preciser cert nuancies. Minu radicales e quelc suffixes in plu, esque to ne es un fundamental qualita de un lingue artificial ? Nor lingue national have un numer de afixes tri o quar vezes plu grand quam Esperanto.

Poy il proposit por li casu de un ruption definitiv con li Esperantistes al comission du reformes in plu : substitution del suffixe -yor a -ing e adoption de suffixes viceant cert succession de suffixes « por alleviar li paroles », p. ex. « kred-udo » vice « kred-em-eso », « ag-udo » vice « ag-em-eso » ; « kred-ublo » vice « kred-ebi-eso », « universenzo » = « universal-eso ». Ti exemples prova que ancor in 1907 li max « competentes » ne hesitat vicear li international paroles per personal fabricationes.

EDGAR DE WAHL E LI DELEGATION. — Li partisans del naturalita ne restat inactiv in ti memorabil epoca, ma regretabilmen ili ne posset concordar pri un systema. Ili contentat se per platonic protestes contra li judicie del Delegation e semblat paralySAT del hegemonie de Esperanto.

In novembre 1907 Molenaar scrit a Jespersen que li comité del Delegation hat esset *ein esperantistisches Komplott*. Ne un « complot », ma un *incompreension* total por li solution natural del problema !

Un sol mann protestat energicmen contra li solution claudicant e inscientic del Delegation : Edgar de Wahl. Per su vast erudition e li justess de su conceptiones il hat devenit li chef del scol naturalistic. Il inviat al Delegation un memorandum quel es mentionat in un circulare distribuet de Couturat al membres del Comision permanent li 6. novembre 1907 :

« Yo ha ricevet un memorandum de sr Edgar de Wahl, de Reval, de 16 pagines in-4°, datat del 11. octobre e adressat al Comité. Quam li autor self dit, il ne aporta un tot pret project, ma teoric idés, queles il ja ha exposit in li jurnal « Progres » (Red : Ples ne confuser « Progres », plu tard « Progress » redactet de Rosenberger con Progreso de Couturat) noi ja ha resummat les in nor libre « Les Nouvelles Langues Internationales » e vu save que ili ha inspirat a sr Rosenberger su project de reform de Idiom Neutral quel noi ha discusset in li comité. Noi crede do posser dispensar nos copiar o mem resummar ti memorandum ; noi conserva it ye li disposition, si vu desira prender conossentie de it. It critica Esperanto e Universal e conclude que li Comité vell dever declarar :

1. *que necun del existent systemas es satisfant ;*
2. *que li L. I. a constructer deve reposar sur materies international ;*
3. *que it deve haver un systema precis de formation de paroles quel, per propri regules, obtene paroles realmen international ;*
4. *que it deve haver un grammatica natural productent null form anti-natural ;*
5. *que it deve haver un international ortografie.*

Poy Couturat fini per li trublant declaration al membres del Comission : *It es consentit que li grammatica complet de Ido servi quam base de nor discussiones, e que chascun es suposit accepter de ti grammatica omni to quo il ne propositi changear.*

Null altri mention esset fat pri ti memorandum, quel noi ne posset retrovar in li arkives del Delegation. E tamen it contenet just li principies de un ver L. I. : ortografie international e ne ti de Esperanto, systema de derivation retrovant li formes international, in vice del systema Couturat quel format horribil monstrus.

On ne comprende pro quo ti important memorandum, inviat li 11. octobre, recivet in li comensa del sessions del Comité (15.-24. octobre), ne esset comunicat a ti Comité, ma solmen resummat in un pagin in su circulare 2 semanas pos li sessions. On anc ne comprende per quel jure Couturat imposat li project Ido quam base de discussion, li 6. novembre, in li Comission permanent, mem ante que li response del Esperantistes esset conosset.

In li revue *Korespondens internasional* de marte 1908 de Wahl protestat contra li composition mult tro esperantistic del Comité e contra su decisiones. Il acusat li Comité har fat solmen moderat reformes por seducter li Esperantistes (quo esset tre just !)

De Wahl suspectet que li autor de Ido esset un membre del Comité (= Couturat) e sumnat Couturat dir li veritat. Couturat afirmat que ni il ni Leau esset li autor e parlat ancor pri li "ridinda insinuation" de De Wahl (Prog. I, 184). Ma li autor de Occidental ha sempre esset dotat de un cert clarvidentie (Vide 20 annus plu tard Coam. 1936, p. 88).

In Progreso I 468, De Wahl excusat se pro har suspectet falsmen Couturat e adjuntet in su proto-Occidental: *Ceterly mi deve subtener mi opinion que l mysteriosid con quel l Comité covri su labores dona loc a tut suspiciones... Cel declaration ne es un insinuation, come le noma sr Couturat ma un postulation publicar l material, que no essi entiat a l Comité por esser inferrat in su archiv !*

LI SYSTEMA DE DERIVATION DE COUTURAT. — Pluri coses esset bon in li Reform-Esperanto, p. ex. li supression del obligatori acusative e del acord del adjectives. In revanche li plurale per *-i* esset un erra, nam *-s* es mult plu international. On preferet li *-i* por posser conservar li finales *-as*, *-is*, *-os* de Esperanto !

Ma li systema de derivation, basat ne sur li logica (quam on crede falsmen), ma sur du regules conventional inventet de Couturat e nullmen logic, ha constituet durant 30 annus li max grand impediment al difusion del lingue, li max bon arm del Esperantistes contra Ido.

Su origine ? Studiante li derivation de Esperanto, Couturat remarcet quelc diferentias e hesitationes in li usation del suffixes. Il opinet necessari regularisar ti derivation e exposit su propositiones in un brochura *Etude sur la Dérivation* publicat in comensa de august 1907 e distribuet in li duesim Esperanto-congress in Cambridge. Ti studie fat un grand impression favorabil sur li Esperantistes ; pro to Couturat includet su systema de derivation du mensus plu tard in li projecte Ido quel De Beaufront acceptet presentar in li Comité. Enorm erra : on ne posse judicar in 2 mensus li valore de un systema. Couturat esset completmen dupat del unesim impression.

Examinante omni testimonies queles Couturat recivet pos li publication de su systema de derivation on es astonat del unanimita del responses. Omni Esperantistes o presc omnis aprobat ti systema, **mem tis queles plu tard combattet it max violentmen**. Talmen Couturat venit avan li Comité de Delegation con li conviction que il hat trovat li ove de Columbus !

Vi quelc excerptes de lettres :

Generale Sébert scrit le li 10 septembre 1907 : *yo releet con interesse desde mi retorn del congress (de Esperanto in Cambridge 1907) vor "Studie pri li Derivation." Ti oure es importantissim e apare me meriter li tot approbation concernent su conclusiones queles sembla dever esser adoptet del impartial Esperantistes.*

Li avocat **Michaux**, president del unesim congress de Esperanto in Boulogne sur Mer in 1905, consiliat ja in un lettre datat dal 14. mai 1907 a ne changear alquo in Esperanto sin necessita... *Li pronominas queles vu proposi posse nocer li ver reform quel vu deve far, li logic derivation. Lu max bon vell do esser changear necos in to quo existe, supleer to quo manca e editer seriosi regules de derivation.*

Professor **Aymonier** anc scrit le li 27. septembre 1907 : *Yo ha esset astonat del grand numer de casus queles vu ha regularisat in vor "Studie pri li Derivation". In summa, vor reformes completa felicimen li lingue sin minim alterar it.*

Mem **Jespersen** aprobat completmen ti systema e in li prefacie del unesim vocabularium de Ido in 1908 proclamat que concernent li derivation "Couturat ha tre bon monstrat li via a secuer !

Anc li grand esperantistic autor **Zakrzewski** scrit a Couturat in 1908 : *yo deve confesser it sincermen, li project Ido sembla me in su totalite inferiori a Esperanto, exceptet cert partes remarcabil, por exemple li principies del derivation*

Anc in 1909 **De Courtenay** scrit : *Li derivation del paroles in Ido es perfectionat. Ta it es plu logic quam in Esperanto original.*

Impressionat e dupat per un tal unanimita Couturat elaborat li unesim vocabulariumes de Ido con li conviction que su systema constituet un splendid decovriton.

Pro que noi ha exposit e criticat li regules de Couturat in apart documentes, noi va ci solmen citar les curtmen : ili es basat sur li principies de **reversibilita** quel Couturat considerat quam li "corolarie" natural del **unasescense** o monosemie postulat de Ostwald. Ancor hodie li Idistes asserite que li bases de Ido es li **unasescense** de Ostwald, li **renverseblesse** de Couturat, li **maximal internacionese** de Jespersen. Li ultim nequi contesta. Li du altri principies constitue un **intrusion inutil del mathematica in li dominia tot different del linguistica**. Reversibilita es : si on departe per un regul de un parol, on deve revenir al punctu de departe per li regul oposit. Teoricmen ti "reversibilita" apare util ; in practica it ducte al mutilation del vocabularium international e al creation de un lingue de mathematicos.

Basante se sur ti principie del reversibilita, Couturat regularisat li derivation **verb-substantive** e li derivation **adjective-substantive** : Si al finale del verbes, *-ar*, on substitue *-o*, li parol obtenet indica sempre li **action**. Quande p. ex. on deriva *vid-o* de *vid-ar*, li derivate *vid-o* indica sempre un action. Li immediat consequentie de ti

regul es que on ne posse dir p. ex. *kr̥on-ar*, *urin-ar*, *martel-ar* etc., pro que revertente al nomin por *-o*, li paroles obtenet *kr̥on-o*, *urin-o*, *martel-o*, etc. vell significar ne li *coron*, li *urin*, li *martell*, ma li action *coron-ar* (*coron-ation*), *urin-ar* (= *urin-ation*), *martel-ar* (*martell-ation*). Pro to Couturat adjuntet a su verbes li suffixes *-iz*, *-if*, *-ag* etc. (*urin-if-ar*, *kr̥on-iz-ar*, *martel-ag-ar*). Talmen in su systema *martelo*, *kr̥ono*, *urino* indica li cos concret e *kr̥on-izo*, *urin-ifo*, *martel-ago* li action.

Couturat considerat quam inadmissibil li derivation direct e citat quelc verbes havent divers signification in li lingues natural, p. ex. *dokumentar* quel significa in francés *dar documentes* e in german e tchec *pruvar per documentes*, ma to esset presc li sol exemple de divergentie quel il posset dar. **Ti infelici « dokumentar » ha servit durant 7 annus quam scude contra qualcunc simplification del derivation de Ido.** Couturat obstinat se alongar su verbes per li suffixes *-iz*, *-if* etc. Il admonit su letores : *Supresez un de ta afixi e la tota konstrukturo krulas : l'unasenceso esas ruinita neremediable. Tala konsidero valoras plu multe kam l'exemplo di nia lingui qui esas omni neologi-kala...* (Progr. 1911, p. 219).

Li duesim regul de Ido concernet li derivation adjective-substantive. Couturat hat esset chocat del facte que in Esperanto on deriva p. ex. de *sana* (*san*), de *felicha* (*felici*) indiferentmen *san-o* o *san-eco*, *felich-o* o *felich-eco*, etc. por formar li nomines de qualita. In su *Krestomatio* Zamenhof self scrit p. ex. *kun fiero* durant que li lexico indica *fier-eco*. Couturat ne admisset ti variationes, il etablisset do li regul : *un substantive derivat immediatmen de un adjective per substitution de -o a -a significa sempre : « qui es tal »*. Por li qualita on deve sempre adjunter *-eso*. Do *san-a* = *san*, *san-o* = *san person*, *san-eso* = *san-ita*, *felica* = *felici*, *felich-o* = *felici person*, *felich-eso* = *felicitas*. Per ti geometric systema Couturat credet har fixat, regularisat li derivation e impedit omni hesitation. Pro manca de piazza noi ne posse demonstar ci li anti-logic e anti-natural consequentie del regulas Couturat, ma nor letores va constatar les in li excellent brochura *Essai sur la Dérivation comparée dans les langues naturelles et artificielles* de Aymonier, anc in *Cosm.* nro 78 (p. 90), nro 83 (p. 53) e nro 93 (p. 21). Concernent li *monosemie* o *unasenceso*, ples leer nor *Doc.* 107, u noi ha pruvat que ti principie ne es aplicat in Ido.

ANTIDO. — Couturat strax trovat un seriosi adversario in un altri matematico, René de Saussure. Ti sviss professor, quel hat in prim aprobat li derivation Couturat, comensat criticar it departente de un altri principie : ti de *necessita e suficientie*. (Exposit in *Cosm.* nro 81 p. 22). Secun De Saussure li suffix de qualita *-eso* ne deve esser adjuntet al adjective pro que li ide de **qualita** es ja contenet in li adjective ; do **util-o** e ne **util-eso** por significar li **util-ita**. Por saver esque on deve adjunter un suffix o ne, **on deve in prim analysar li parol !** Por emfisar su oposition al systema Couturat, De Saussure adoptet li pseudonym *Antido* (= Anti-Ido) e desde 1908 combatte in innumerabil articules, brochuras e libres li derivation Couturat quam inlogic.

Li origine del derivation Antido es facil a divinar. It veni directmen del formules usat por definir un form geometric. In funde Couturat e De Saussure es matematicos querellant pri principies matematic : *reversibilita o necessita ?*

Anc li « principie de necessita e de suficientie » ne solue li problema del derivation. Contrarimen a to quo crede De Saussure, it ne es sempre conform al natura homan. Noi va citar un exemple : Secun li principie De Saussure, on deve evitar li suffix de qualita *-eco* pos li adjectives (p. ex. *utilo* e ne *util-eco*, *bono* e ne *bonita*) pro que li ide de qualita es ja contenet in li radica *util*, *bon* etc. Benque li Academie de Esperanto adoptet ti principie oficialmen, ancor hodie li Esperantistes continua usar li suffix *-eco* por li adjectives, e li revue « *Esperanto* » de april 1919 explicat ti resistentie diente que ti suppression de *-eco* es un pecca contra li *linguistic instincte* e que li *lingues natural* adjunte un special suffix egalmen al adjectives primitiv o derivat.

On vide do que, malgre omni regulas imposat, li Esperantistes parla secun li model del lingues natural e ne secun li theorie de un systema matematic de derivation.

DE WAHL E LI SYSTEMA COUTURAT. — Li querell inter Couturat e De Saussure ha ocupat li interlinguistes durant plu quam 7 annus e dividet les in du campos hostil, querell enorm, ardent, incessant e tedant. Hodie ti discussiones apare risibil, mem meskin e scolastic, nam ili basat se sur li artificial grammatica de Esperanto, it es sur li finales a priori *-o*, *-a*.

Anc De Wahl protestat strax contra li pseudo-logic derivation Couturat, ma pro motives linguistic e ne matematic, ja in un moment quande De Courtenay e Jespersen ancor admirat it. In *Progr.* 1908, p. 71 il contradi coragiosimen Couturat : *Esque sr Couturat va audaciar leder ti practicmen logic custom de omni popules, que on posse derivar immediatmen verbes de concret substantives, e imposar sur propri logica al monde ? Esque per tal maniere on obtene un lingue max facil por li majorite ?*

Ne solmen li romanic e germanic lingues have tal derivation, ma anc li slav, finn, turc lingues, etc. P. ex. : German : *Krone*, *krönen* ; Anglés : *comb*, *to comb* ; Hispan : *fruto*, *frutar* ; Ital. : *corona*, *coronare* ; Francés : *plomb*, *plomber*.

PROGRESO. — Si Couturat escarnotat li discussiones linguistic in li comite de 1907, almen il havet li merit admitter les in su revue *Progreso*. Talmen, li labore quel li Comite devet har fat, esset fat plu tard, ma tro tard ; it ne servit a necos : **on cor-**

rectet quelc detalies, ma ne volet tuchar li esperantic fundament por ne « subverter » li lingue.

In li 7 tomes de « Progreso », Couturat ha fat un labor gigantesco. On posse solmen regretar que ti enorm activitá usat se in fals direction, in li obstination imposar un specie de fals logica in li interlinguistica.

Couturat ne omisset ni un ocasion mocar li eforties del scol naturalistic por etablisser un systema regulari basat sur li naturalitá. Recensente p. ex. li contenete del revue *Correspondens international*, il mentiona « ti qui propozas la sufixo -aciono vice la sola logikala sufixo -o. (Quande Couturat volet far un parol tabú il nominat it « logikal ! » Hodie on subride avan tal assertion, nam on ne comprende qualmen -o es plu *logikal* quam -ation !) Anc Couturat remarcet : *Si on accepte -aciono, on deve anc accepter -iciono, -uciono, -mento etc. e li regularitá es perdit.*

Hodie Couturat ne plu vell posser condemnar li naturalitá in li nómin del regularitá : -ation, -ition, etc., omnicos es ordinat per un sol regul.

De Wahl sempre protestat, anc in Progreso, contra li mecanic logica inplantat sub li suggestion del potent personalitá de prof. Couturat e postulat que *on mey egardar plu li leyes del psykologie e analogie queles es certmen plu facil al max multes, quam li logica, quel in general ne es amat* (Kosmoglott, januar 1926).

Il ne timet proclamar a Couturat (Progreso I, 646) : *Noi vole un lingue international e ne filosofic basat sur li logica. Li logica es li minim expandet qualitá del homes, quo yo posse constatar per 15 annus de labor quam professor. Custom e imitation es li du qualitás per queles li max grand partes del homanité aquisite lor conossenties.*

Quande on lee Progreso 1908-1914 on es frappat per li continui pussada vers li naturalism. On senti que Couturat esset dividet inter du tendencies contrari : in un láter il havet apu su manie del « logicitá » un grand qualitá : li amore al progressa, e il insertet sin hesitar in Progreso omni contributiones linguistic, mem contrari a su idés ; pro to ti revue es ancor hodie tre interessant a consultar. In altri later il volet conservar li disciplina in Ido, pro que sin disciplina it esset impossibil editar libres de aprension e vicer li Esperantistes. Pro ti paradoxal situation, **Progreso es sempre plu interessant per li reformas proposit, ma ne admisset, quam per li propositiones acceptet !** On posse dir que omni principies del scol naturalistic esset exposit in Progreso, benque ne egardat del Idistes. Li interesse editorial e li tactic necessitás esset tro potent.

Talmen on posse presc secuer in Progreso li evolution del scol naturalistic, li formules trovat poc a poc per De Wahl o su gruppe e li discussiones in revues desaparit quam « Progress », « Idei » etc. (vide Tabelle synoptic, Doc. 79)

IDIOM NEUTRAL. — Durant li sessiones del Comité del Delegation on mult parlat pri Idiom Neutral quam possibil concurrent de Esperanto. Aparit in 1902, it esset elaborat de un Academie international quel hat departet de Volapük e quel, per successiv reformas votat de su membres, hat evoluet til un naturalatri lingue auxiliari, sub li direction del russ ingeniero **Rosenberger** de St. Petersburg. Idiom Neutral es un del projectes max complet quel esset proposit desde Volapük. It presc contrabalanciat Esperanto in li iudicament del Delegation in 1907 e con plu mult reclame — **e sin li regretabil influentie de De Beaufront** — it forsan vell har esset preferet, nam Couturat e Jespersen esset tre favorabil a it.

Adver Rosenberger ne presentat Idiom Neutral self al Delegation, ma un modification de it, nominat **Neutral Reformed**. Il hat venit in octobre 1906 a Reval (vide su revue Progres) por far conossentie del labores de De Wahl, labores ancor ne finit, poy il reformat su Idiom neutral primitiv ma regretabilmen sin voler secuer omni consilies de De Wahl. Si il vell har secuet les, il vell har successat che li Delegation. Ti projecte de Idiom Neutral Reformed, quel Rosenberger presentat in manuscrit al Comité de 1907, esset publicat in li revue Progres septembre-novembre 1907. In Progreso 1908 p. 71 Couturat opine que *to es un grav labor quel merite grand attention e cuidosi examin* (On questiona se pro quo ti examin ne esset fat just plu cuidosimen in li Comité !) In li sam numero de Progres Rosenberger citat extractes de su correspondentie con De Wahl, quel ductet le a su reform-project.

Li grand defect de Idiom Neutral es, que it ne posset dar clar regules de derivation. It hesitat sempre inter regularitá artificial e naturalitá irregulari. It havet p. ex. *dirigar* e *direktor*, do du radicas, ma inventar dat regularimen *inventator* e Idiom Neutral admisset un duesim radica *inventor* por evitar *inventator*. On anc trovat in Neutral *inversion* irregulari e *inventasion*, regulari ma repugnant. Li problema del naturalitá regulari devet esser soluet de De Wahl solmen 15 annus plu tard.

Pos Idiom Neutral li max remarcabil project del scol naturalistic, presentat in 1907, esset **Universal** del german dr **Molenaar**. Vi un specimen :

Vi ad plan, along spument fluv Pesio, vad tra inclinet florent prati e sub alci de antik kastanieri.

Omni ti naturalistic systemas evitat li artificial finales de Esperanto, ma lor grand defecte es que ili ne posset derivar regularimen li international paroles. Ili admisset p. ex. li paroles natural per -ation, -tion, -or, -ator, sin posset indicar qualmen on deriva les de un radica.

INTERLINGUA O LATINO SINE FLEXIONE.

Un altri tre sympatic gruppe in li scol naturalistic serchat li solution sur li base del Latin. Su chef esset Giuseppe Peano, prof. de mathematica (ancor un matematico!) in li università de Torino. Vi un exemple de Interlingua :

« *Interlingua proclama su vexillo de insurrectione contra tyrannia de grammaticos...*

« *Latino (di Interlingua) per causa de suo politico neutralitate, et valore culturale es saepe proposito quale lingua auxiliare ; sed latino classico habe difficultates et irregularitates, et suo caractere flexivo es contra tendentia de spiritu moderno.*

Peano, invitat venir avan li Comité quam autor de lingue, declarat que il havet solmen teorik idés, e pos ti declaration per quel il semblat renunciar a omni personal project, il esset electet membre del Comité. Poy il refusat aprobar li decisiones de ti Comité, pro que il « ne assistet li final sessiones », e reservat su libertá.

Poy Peano restaurat li Akademi de Idiom Neutral e fundat li revue « *Discussiones* », nominat plu tard « *Schola et Vita* ». Il successat substituer su Latino sine flexione a Neutral in ti Academie, contra li protestes de Rosenberger.

Concernent li valore del systema de Peano noi refere al studie detaliat de prof. von Sydow de Svedia in *Cosm.* nro 74 : *Li conossentie del latin es in nor témpor tam poc difuset que un ordinari hom ne save it, e anc inter li scientistes existe multes ne save it o save it tam mal, que ili ne posse comprender un textu scrit in li simplificat latin. To depende anc del fact que li latin have mult paroles ne international, e mult international paroles manca in latin, e deve esser hauset de altri fontes.*



E. de Wahl in li epoca del Delegation

LI L. I. CORAM LI LIGA DEL NATIONES. — Strax pos li foundation del Liga del Naciones, li Esperantistes efortiat obtener li adoption de lor lingue quam lingue oficial. Ili possedet tenaci avocates quam *dr Privat*, li belg senator *Lafontaine* etc. Malgré un habil diplomatic preparation, ili ne successat. Li Liga decidet nominar un Comission por studiar li problema ne solmen de Esperanto, ma del L. I. general. Li raportator de ti comission, prof. *Gonzague de Reynold*, professor in li università de Bern, enunciat in 1923 li verdict quel aparit 2 annus plu tard in li *Revue de Genève* (mai 1925). Ti raport declarat Esperanto « **barbaric, sin precision** », e su usa « **cause e efect de decadentie intelectual** ».

De Reynold esset un scrittor de alt aristocratic rang, grand admirator del classicism e del tradition. Su verdict esset previsibil del comensa. Por condemnar Esperanto il besonat solmen prender li arsenale del argumentes idistic, e, por condemnar Ido, citar li criticas del Esperantistes ! Pos to il ne havet pena demonstrar que ni Esperanto ni Ido es apt e que li sol solution possibil es revenir al latin del medievie ! Qualmen li popul va posser usar un lingue mort quam L. I. quande mem li latinistes ne posse comprender unaltru per ti lingue, to il ne considerat. Per un ironie del fate, li sam numero del *Revue de Genève* contenet un long studie de un doct latinist, prof. J. Marouzeau de Paris, concludent que it es un van reva creder que latin va denov posse luder li rol de L. I. Visibilmen sr de Reynold hat consiliat qualcunc solution, mem inrealisabil, pro su comprensibil horrore pri un lingue artificial.

De Wahl adressat al sede del L. d. N. un apell in li nomin del *Societé interlinguistic Kosmoglott* de Reval (Tallinn).

Sam quam al Delegation, De Wahl ne proposit un lingue, ma indicat e justificat li ver principies del L. I. (*Kosm.* nro 1., februar 1922). Il developat li tri sequent teases :

I. On deve selecter li L. I. max perfect in se e ne li max expandet.

II. Li max bon L. I. es ti quel es max international (pro que noi aprende un lingue tam plu facilmen, que it contene conossat terminos.)

III. Por trovar li max perfect L. I. on vell dever apertur un general concurs.

In sam témpor (februar 1922) De Wahl comensat publicar un litt revue « **Kosmoglott** », de quel li unesim numero, redactet in Occidental just aparit, exposit li principies del lingue con un clave monstrant lor application. Do li comission emanat del L. d. N. posset prender conossentie de Occidental. Tamen su raport mentiona Occidental per un sol linea ; in revanche Romanal de sr Michaux esset discusset con mult sympatie pro su proximitá al latin !

OCCIDENTAL E KOSMOGLOTT. — Li articules publicat de De Wahl in *Kosmoglott*, poy *Cosmoglotta*, de 1922 til hodie constitue certmen li max important contribution aportat de un sol mann in li dominia interlinguistic. Mult plu valorosi

quam tis de Couturat in 1908-1914, quel perdit su tēpor in polemicas steril contra De Saussure, ti studies ne posse esser exposit, ni mem resummat in li present « **Historie** ». Ma pro que li ancian numeros de Kosmoglott es hodie exhaustet, un collection del max important articules de De Wahl, sub li nomin de « **Spiritu de Occidental** » es in preparation. Noi recomenda al letor ti important ovre.

Occidental ne ha surtit per un sol colp quam Minerva tot armat, ex li cerebre de un mann. De Wahl ha elaborat it in plu quam 30 annus e pensat a it ye omni moment desde su yuness. It es interessant secuer ti lent elaboration tra li divers revues interlinguistic desde 1887. Regretabilmen ti revues es introvabil hodie, ma in un brochura **Origines de Occidental**, li sviss prestro Creux ha resummat li historie de Occidental ante su publication. In it on vide Occidental preciser se poc a poc, evoluer in **Auli**, un specie de Proto-Occidental. On anc va trovar mult detalies interessant in un brochura pri **Lott**, scrit in 1935 de sr Janotta in Vienna.

Ci noi da solmen quelc dates : Ja in 1896 De Wahl exposit su systema del **3 vocales del verbal radicas** quel constitue hodie li base de Occidental. In 1909 il decovrit li **division del verbes static e dynamic** pri queles Couturat mocat in Progreso benque ti division just permesse regularisar li derivates per **-ntie** e **-tion**. In 1912 il publicat li 3 famosi regules del supin, per queles plu quam 10.000 paroles, til tande considerat quam irregularisabil, es incorporat in li systema per un maniere ingeniosi. Couturat denove mocat e criticat ti decovriton sin comprender que it dat li solution.

Ja in 1888, **Lott** hat constatat que li max grand obstacul in li creation de un lingue natural e regulari consiste in li duplic radicas de multissim paroles international, it es **inter li infinitive e li supin del verbes latin**. Qualmen passar del radica del infinitiv a ti supinal sin conservar du radicas por chascun familie ? On discusset long ti problema in li revue *Interpretor e Linguist* (vide tabelle del revues, Doc. 37) ma sin successar soluer it. *Rosenberger e Molenaar* eludet li desfacilitá in lor systemas *Neutral* e *Universal*.

De Wahl laborat pri ti problema ja desde 1894 ; in 1922 il publicat li solution.

De Wahl aserte que : *til Occidental li direction naturalistic " restat steril pro que tal systemas depende de latin con su irregulari derivationes e, ne havent un clar propri systema de derivation, ne posset formar autonommen nov formationes de paroles. Solmen Rosenberger in su Reform-Neutral ha provat soluer li problema, utilisante mi explorationes tande ancor ne finit e ne publicat. Ma basante se sur principies volapükatri il ha misviat ».*

Null lingue del scola naturalistic posse successar ante li aparition de Occidental, pro que necun de ili esset sufficientmen regulari. Quam noi monstrat in Doc. 113, Rosenberger efortiat regularisar su lingue, ma in su ultim projecte *Neutral Reformed* de 1908, recenset de Couturat in Progreso 1908, p. 308, il esset ancor obligat admitter 81 verbes con irregulari derivation. Ti 81 verbes queles producte mult altri verbes derivat (p. ex. prender, comprender, prens, comprens) havet in *Idiom Neutral* du radicas, quo es tam plu genant que ili es inter li verbes max usat.

De Wahl ha indicat insuperabilmen in *Mondo* de januare 1927 li ver fundament del lingue international : *Por laborar vermen scientific, on deve absolutmen obliviar omni Esperanto-remiscentie, e comensar su explorationes ye li materiale de international paroles, specialmen tis queles contene divers sovente repetit suffixes : -ion, -entia, -ura, -tor, -sion, -in, -iv, -ette, etc., e serchar comprender li ver relation inter ti elementes, e tande poy ne decretar ma escutar e serchar harmonisar li trovat coherenties.*

On vide nu li differentie de metode inter De Wahl e li altri interlinguistes in li **selection del suffixes**. De Wahl considera li vocabularium international e li suffixes international ja usat quam un fact indiscussibil. Il sercha solmen trovar tam exactmen quam possibil li **signification de chascun suffixe ja existent**, evitante inventer un sol. Li altri interlinguistes adopte solmen quelc suffixes international, mutila altres o da les un signification inexact pro que ili ne prendet li pena studiar li leyes del derivation natural.

Ti determination del rol exact del suffixes natural ha esset tant long que it ne esset tot finit in 1922. Noi save it per li passagie secuent de un articul aparit in 1924 in *Cosmoglotta*.

On hat reprochat a De Wahl que in 1922 il ne hat dat li exact signification de **omni** su suffixes. De Wahl respondet :

Yo ha preciset suficient bon circa 20-30 suffixes. Li max precis sense p. ex. de -atu yo trovat du annus antey. Forsan yo va con tēpor trovar anc li sense precis de -il, -esc, -itudo etc... Regretabilmen yo posse dir que ne mem un sol hom ha auxiliat me in ti labore, quel es un del principal in construction de L. I. Si yo ha publicat mi ovre ante absolut perfection, to ha esset li consequentie del tactica del Esperantistes, queles per lor sollicitationes che li Liga de Naciones ha me fortiat publicar mi ovre ne tot harmonisat, por monstrar que existe anc un altri solution possibil e plu international.

In 1908, Couturat posset questionar Molenaar, un del representantes del scol naturalistic : *Qualmen vu posse derivar komprenebilitat de vor verb komprender, si vu ne admesse, quam Rosenberger, du radicas por un verb ?* — Hodie Couturat vell dever tacer, nam mersi a De Wahl li regularitá e li autonomie es perfect : **comprend-er, comprens-, comprens-ibil, comprens-ibil-itá.**

Couturat e De Beaufront esset convictet que li lingues natural es irregulari, inlogic lingues. De Wahl monstrat que in contrari ili es mult plu logic e regulari quam on crede ; il efortiat penetrar lor structura, comprender lor celat harmonie.

Desde su aparición, Occidental ha desarrollado gradualmente. Su Organ central, **Kosmoglott**, in comensal apertus a omni systemas de L. I., esset redactet til fine de 1926 de Sr E. de Wahl. Desde 1927 un grupp de ingeniores in Wien (Austria) continuat li publication del revue sub li nomin « **Cosmoglotta** » proposit del linguist american Guérard in su brochura *A short History of the int. language*.

Quam on posse constatar per li annu-colectiones de Cosmoglotta, Occidental presc ne besonat changes. Solmen quelc detalies esset modificat, li aspect del lingue restat li sam. Inter li cardinal modificationes noi cita : Admission del contraction del passate composit, in maniere anglés : *il ha videt* — *il videt*. Suppression del litteres apostrofat. Li circa 60 paroles contenenet ti litteres recivet un ortografie levimen modificat.

Omni substantives queles da derivates per *-matic* prendet li finale *-ma*, quel forma regularimen li finales adjectivis per *-t* eufonic, p. e. *systema*, *systema-t-ic* etc. *Mi* esset viceat per *yo*, *mi* per *mi*, *vo* per *vu* etc. Altri changes proposit esset in experimentation durant pluri annus ma ne sanctionat del practica.

Hodie noi conosce apen 2-3 adeptes proposit changes in Occidental, e changes concernent solmen detalies, paroles isolat. Quando on conosce li historie de Volapük, Esperanto e Ido e li long luctas inter conservatores e reformistes, on deve constatar que Occidental es li unesim lingue quel compleet ti extraordinari cose : li pace intern. It debi ti avantage de stabilitá a su equilibrie inter regularitá e naturalitá.

CURTITA, MEDIALISATION, ANALYTISM. — Del circa 400 projectes aparit desde Esperanto, poc presenta nov idéas o nov conceptiones. Li plupart es variantes o imitationes de Esperanto, Ido, Occidental. Quam apart systemas noi posse citar *Pan-Kel*, *Medial*, *Uniti Langue*.

Pan-Kel aparit in 1905 ; su autor, Wald, Germania nominat it « *die kürzeste und leichteste Weltsprache* ». It es composit del max curt paroles prendet ex 37 vivent lingues, precipue ex anglés e german. Un frase quam : pos que yo hat leet un jurnal yo scrit un ilustrat post-cart es dit in Pan-Kel : *sytho ye vilap o*.

Li facilitá resultant del acurtation es illusori nam si li letor o auditor deve serchar durant quelc minutes li sens del paroles mutilat pro acurtation, **li beneficie del curtitá es perdit**. Li stenografie es un arte util in mult casus, tamen nequi va propositir supresser li lingue scrit e publicar nu li libres, romanes, jurnales in stenografie !

Li principie de **medialisation** esset aplicat del german Weisbart in su lingue **Medial**. It consiste in combinar paroles ex pluri lingues e trovar un form medial. Li resultate es presc sempre un parol incomprendibil. Vi quelc exemples :

F **Pentecôte** + G **Pfingsten** = **Pingoste**. — E **need** + G. **benötigen** = **nodir**. — F **fer** + H **hierro** + A **iron** — **fiere**.

Ma li resultate ne auxilia li letor in li comprension, nam *pingoste* sembra esser ye unesim vise un *penguin* !, *nodir* li verb *nodar*, e *fiere* li francés adjective *fier*. Adplu li formes obtenet — sr Weisbart confesse it — depende del arbitrie del autor. In facte li medialisation vell tam bon dar por li supra exemples : **Pfingote**, **benidir**, **heron**, etc. Null criterie scientific !


Sr Weisbart comprendet bentost que il secuet un fals via e recomensat su labores, queles resultat ti vez in un solution presc identic a Occidental. Su **Mundi-Latin** difere de ti-ci solmen per quelc vocabules un poc plu latin.

Uniti Langue, creat in 1922 de du Idistes german, srs **Scheffers** e **Riedel**, ha secuet li principie del analytism til un gradu nequande atinyet. Vice formar families de paroles per li medie de prefixes e suffixes adjuntet a un radicale, it accepte li paroles international sin ocupar se pri lor composition o derivation. Sol 3 suffixes have li favore (on ne save pro quo !) posser formar derivates regulari in U. L. : *-te* (numerales), *-er* (actores), *-eri* (loc). On trova p. ex. li parol *langue*, ma *linguist*, e poy *linguistic* sin connexion grammatical. Li autores de U. L. justifica li rejection del autonomie per li facte que li lingues con derivation regulari forma *sempre repugnant derivates* ! Ti acusatation es rect por li systemas in queles li afixes es inventet, deformat o mal selectet, ma ne por Occidental. **Li timore del innaturalitá ductet srs Scheffers e Riedel a renunciar omni autonomie, quo es exagerat**. Noi concorda completmen con sr De Wahl quando il di : *Li creativ autonomie es un indispensabil qualita de un ver real lingue. Uniti Langue quel ne posse crear ni un sol propri parol, ma deve hauster ye hasard su paroles sin coherentie mutual ex un del 3-4 divers lingues, plu rectmen vell portar li nomin « Diversiti Langue »* (Doc. 57).

Li aspect de U. L. plazza it inter german e anglés. Un exemple de U. L. : *dat nos did success*. (Occ. : *que noi successat*.)

Li Esperanto-movement ha naturalmen mult suffret del concurrentie de Ido, precipue durant li activitá de Couturat 1907-1914. Ma pos li guerre it ha developat se vigorosimen pro que li popules sentit li beson de concordie inter se. To es un reaction instinctiv pos omni long e terribil guerres. Li congress de Nürnberg in 1923 reunet ca. 4000 congressantes. Poy li publica visibilmen detornat se de ti lingue tro artificial, malgré un intensiv reclame. Li economic crise, li leyes edictet in quelc grand landes contra li organisationes con tendenties pacifistic ha fat Esperanto seriosimen regresser. Desde 1935 un skisma del oficial organisation *Universala Esperanto-Asocio* e fundacion de un nov *Internacia Esperanto-Ligo*, queles trova se in acri mutual polemicas ancor durant li scrition de ti lineas, ha agravat li situation.

Malgré li secession idistic, li Esperantistes esset sovente dividet pri reformes linguistic. Precipue li sufix *-ujo* por landes causat long polemicas. Quelc revues viceat it per *-io* o *-lando*. Altri combattet ti innovation pro que *si on viola li fundament in un sol detalie, altres va haver iure reformar altri punctus*. Li argument sembla evident, nam quande on comensa reformar un lingue artificial on ne save u on deve haltar. It vell esser li comensa del fine. Li Esperanto-Academie energicmen protestat contra tal innovationes, quo ne impedi li « progressistes » continuar usar les.



E. de Wahl (in levul) e Prof. von Sydow
avan li reyal biblioteka de Copenhag (1935)

LI SITUATION ACTUAL. — It es presc impossibil raconter li historie max recent, nam it manca li distantie temporal por judicar. Noi prefere tacer pro li personalitás ancor vivent. Li opiniones evolue sovente tam rapidmen que un adversario de hodie posse deman esser un alliate.

Sr Guérard in su *Short History* 1922 mentionat per ordin de importantie li 4 systemas secuent: *Esperanto*, *Ido*, *Interlingua*, *Romanal*. Hodie li secution vell esser, secun extension del lingues: *Esperanto*, *Occidental*, *Ido*, *Interlingua*, *Novial*.

30 annus ha passat desde li evenimentes de 1907, 30 annus de antagonism inter Esperanto e Ido, guerre fratricid, incessant e inutil. Hodie pro morte del principal actores de ti drama, Couturat, De Beaufront, Ostwald, Lemaire, Sébert, Cart, Bourlet etc., li passiones es un poc calmat, ma li situation resta li sam, it resta insolubil, e it ha durat sat long.

Sol un nov conception, ti del naturalitá regularisat, posse reunir li fratres inamical. E hodie, Occidental efectua ti miracul: it reuni ex-Esperantistes e ex-Idistes in un comun ideale.

In Occidental on trova combinat un natural stabilitá con omni reformes desirat del progressistic Esperantistes e Idistes.

Li autor de Occidental ne ha juit li subit e grand fama quam Schleyer e Zamenhof; durant mult e mult annus on ne comprendet le, benque il colaborat successivmen al amelioration de Esperanto, Idiom Neutral e Ido. In 1927 on posset ja nominar le **li max grand interlinguist vivent**. Hodie, deci annus plu tard, il resta li max alt lumine del Interlinguistica. Festante li 11 august 1937 li 70-im anniversarie de su nascentie il mey reciver li emoet homage de nor gratitá.

Ric Berger.

Quelc capitules de ti Historie devet esser omisset pro manca de spacie. Noi cita: li systema Romanal — li syntetic passive, manca de logica e 3 infinitives de Ido — li polemicas inter de De Beaufront e De Wahl — li funest influentie de De Beaufront durant omni fases del historie del L. I. — li historie de Ido e nascentie de Novial — collaboration inter Prof. Jespersen e De Wahl — li convergentie de Novial e del reformistic Idistes vers Occidental — li revue *Tolero-Interlanguages*.

Nor letores va trovar li omisset capitules in li proxim numero de *Cosmoglotta A*, 117, septembre 1937.

OCCIDENTAL LITTERATURA

Afrancat

SFr. 0.50

" 0.40

" 0.60

" 1.50

" 0.30

" 0.30

" 0.30

" 0.40

" 5.—

" 9.80

" 0.50

" 0.60

" 0.80

" 3.—

" 0.50

" 1.—

" 0.50

" 2.50

" 0.50

" 0.60

" 0.50

" 0.40

" 0.30

" 0.60

" 0.30

" 0.60

" 0.20

" 0.60

" 0.20

" 0.40

" 0.30

" 0.80

" 1.20

" 1.20

" 0.50

" 0.40

" 0.50

" 0.50

" 0.20

" 1.50

" 1.—

" 0.30

" 0.30

" 0.20

" 0.30

" 0.30

" 0.30

" 0.30

" 0.20

" 0.30

" 0.30

" 0.30

" 0.30

	Afrancat
Publicaciones in Occidental : AMICIS : Manuel Menendez (Ovre 6)	SFr. 0.60
BALMONT K. : U es mi hem ? (Ovre 2)	" 0.60
BERGER : Curs de Occ. in Occ.	" 0.50
CORDONNIER : Original stenografie de Occidental	" 1.—
COUDENHOVE-KALERGI : Heroe o Santo (Ovre 3). exhaustet	" 0.00
* CREUX : Stenografie Duployé por Occidental	" 1.—
" Rythmica in Occidental	" 0.60
* CREUX e BERGER : Li origines de Occidental	" 0.80
DIVERS AUTORES : Crestomatie de Occidental	" 1.50
FEDERN Ilmari : Lexico Occ.-Occ. (in preparation).	
De GUESNET : Manuale de conversation	" 0.40
GUILBERT-DEMINGER : Vocabularium Occ.-F.A.G. (por li tomes 1-6 de Ovre) ...	" 0.75
HEINI : Li via al prosperità	" 0.50
Ing. HOERBIGER : Quo Occ. presenta al german ingeniero	" 0.50
" (Sam brochura in german)	" 0.50
Ing. JANOTTA : Construction de un terminologic code	" 0.30
JANOTTA : Julius Lott, precursor de Occidental	" 1.20
MASARYK : Democratie e Humanità (Ovre 5)	" 0.45
PICAL : Essentie de Occidental (Cosmoglotta Nr. 56)	" 0.50
PODOBSKY J. : Li astres del Verne (original poemas)	" 0.80
PDE : Un descense in Maelstrom (Ovre 4)	" 0.60
R. ROLLAND : Europa e Asia, con vocabularium (Ovre 1)	" 0.60
TAKUR : Nationalism in Occidente	" 1.10
E. de WAHL : Radicarium directiv in 8 lingues ✓	" 2.50
Ancian collectiones de Cosmoglotta. Secun li annus	de fr. 2.— a 15.—
Ancian collectiones de Helvetia, per annu	" 2.—
Editiones mimeografat.	
Divers : Discos de gramofon, con agulyes (Textu in Occ.)	" 4.50
SKÖLD-PODOBSKY : Tri canzones. Du canzones (por un voce e piano) chascun ✓	" 1.50
Prospecte in Occidental por adjunter in lettres, 10 ex. gratuit ; chascun in plu	" 0.02
Covertes, postcartes con propaganda-textu, 100 ex. ✓	" 1.30
Marcas glutinabil, 100 ex.	" 0.80

Omni ti libres es recibibil de : Institute Occidental, CHAPELLE (Vd), Svissia.
 Posthec-contos : Berlin 1683 36 ; Paris 1765 46 ; Svissia H. 1969 ; Bruxelles 3504.45.

CONDITIONES DE ABONNAMENT. Li precie de un simplic abbonament es li correspondent valore de Fr. 3.50 sviss o 12 respons-cupones. Ti quel misse Fr. 7.— sviss recive 3 exemplares (abonnament de propaganda). Li precie del abbonament in li moné del divers landes es indicat sur li ultim pagine de chascun numero. — Li abbonament a Cosm. es annual, departe del 1-esim januar e continua til li scrit revocation del abonnate. On posse inviar li abbonament al secuent adresses :

ANGLIA : Worker's Bookshop, 49 Farringdon Rd. LONDON, E. C. 1.
 H. D. Akerman, 12 Ollerton Road, New Southgate LONDON, N 11.
 AUSTRIA : Occidental Club Progress, Ing. A. Reichert, Hebragasse 9, WIEN IX. (pch. Wien B 29 460)
 BELGIA : Institute Occidental, CHAPELLE (Vd), Svissia (Pch. Bruxelles 3504.45).
 BRASIL : B. Snaider, Caixa Postal 1338, RIO-DE-JANEIRO.
 ESTONIA : Kosmoglott, Eha 10, TALLINN.
 FRANCIA : L.-M. de Guesnet, 83, Rue Rochechouart, Paris 9 (pch. Paris 26437).
 Institute Occidental, CHAPELLE (Vaud), Svissia (Pch. Paris 1765 46).
 GERMANIA : Occidental-Buro, CHAPELLE (Vd), Svissia (Pch. Berlin 1683 36).
 HISPANIA : C. Varela, Macia 5, FIGUERES (Cat.).
 ITALIA : Dr Ing. E. Dal Martello, GRISIGNANO di Zocco FIRENZE.
 JAPAN : Kokusaigo-Kenkuysho, Daita II-784, Setagaya, TOKIO (Pch. Tokio 62 061).
 PORTUGAL : R. de Beça e Melo, Av. Sac. Cabral 56, PENAFIEL.
 RUMANIA : Aurel Eschenasy, Calea Bresti 27, CRAIOVA.
 TCHECOSLOVAKIA : Jos. Svec, Skroupova 2, PRAHA VII (Pch. Praha, Nr. 9.438).
 SVEDIA : Sved Occidental Federation, Box 171, STOCKHOLM (pch. Stockholm 70 315).
 SVISSIA e altri landes : Institute Occidental, CHAPELLE (Vd), (pch. H. 1969).